

Forum cultural Tujetsch Rapport annual 2007/08

Introducziun

Ils 30 da november 2007 havein nus saviu festivar nies giubileum da 10 onns Forum cultural Tujetsch. Igl ei stau ina biala e digna festividat enramada da producziuns dalla formaziun Krambambuli. El center dalla festividat ei l'ediziun dalla ovra da pader Baseli Berther (1958-1931) stada. Plinavon havein nus saviu discuvierer la biblioteca privata dil scribent indigen Vic Hendry, che ha surdau quei schenghetg alla vischnaunca. La festividat ei vegnida visitada da numerus commembers e d'adherents dalla cultura en ed ord vischnaunca. Nus astgein esser satisfatgs da quella occurrenza, la quala ha concludiu las activitads digl emprem decenni dapi la fundaziun dil Forum cultural Tujetsch. A caschun dalla davosa radunonza generala ha il commember dalla suprastonza Bruno Berther abdicau ed enstagl ei Nicolina Cathomen-Giossi vegnida elegida. Al Bruno s'audi d'engraziar per sia grondiusa lavur e stenta en favur dalla cultura en nossa vischnaunca. El vegn vinavon a segidar cun nus e restar fideivels al forum. La Nicolina ha surpriu igl uffeci da cassiera ed ei sevidada en fetg bein. Ad ella in cordial beinvegni el ravugl dalla suprastonza ed ordavon in grond engraziament per igl engaschi.

2. Ediziun Placi a Spescha

L'iniziativa d'edir in niev cudisch da pader Placi a Spescha ei vegnida dalla inschigniera forestala Ursula Scholian. Sia lavur da diplom tracta il svilup digl uaul ella Val dil Rein anteriur, pia era da nossa vischnaunca. Pader Placi a Spescha era pader dalla claustra da Mustér. Leu era ei denton memia stretg per el. Per quei eis el staus da 1809-1812 caplon a Selva e da 1812-1814 caplon a Sedrun. Denterauter ha pader Placi a Spescha descret minziusamein la Val Tujetsch. Il manuscret datescha da 1805. En quel descriva el per tudestg nossa val e ses vischins a moda fetg interessanta. El vuleva publicar ses texts, mo ha deplorablamein buca anflau in editur. Pér 1913, pia 80 onns suenter sia mort han ils paders Karl Hager e Maurus Carnot ed il bibliotecari cantunal, Friedrich Pieth ediu in tagl da ses numerus manuscrets. Pader Placi a Spescha haveva scret dus manuscrets – il grond cumpeglia 870 paginas ed il pign 460 paginas.

Il Forum cultural Tujetsch ha en collaboraziun cun Norbert Berther ed igl archivari cantunal Ursus Brunold sustegnan la responsabla per l'ediziun Ursula Scholian. Per l'illustraziun dil cudisch ei la renconuschida fotografa Lucia Degonda vegnida engaschada. La vischnaunca sustegn l'ovra cun ina contribuziun da 30'000.00 francs. L'ediziun cumpara igl onn 2009.

4. Giuv – manteniment

Sut il tetel "Sas era nua Giuv ei?" descriva pader Baseli Berther l'ucliva da Giuv. Da gliez temps dumbrava Giuv rodund diesch baghetgs pigns ni gronds e duei esser stau tenor veglia tradiziun in dils emprems uclauns en Tujetsch, sche buca gl'emprem. Che Giuv era habitau pli baul ed ei existeva in vischinadi ei per franc mussau si.

Sper la caplutta da s. Bistgaun stattan aunc dus baghetgs direct dasperas ed in baghetg in tschancun pli ensi. Cunzun il baghetg dalla pleiv ha pitii ils davos onns e va plaunsiu en decadenza. Il forum ha iniziou l'idea da vuler mantener quella pintga gruppa da baghetgs e sanar ils tetgs cun slondas. Il liug exponiu cun la magnifica vesta sur l'entira vallada duei vegnir mantenida. Nus havein tschercau la collaboraziun cun la pleiv, la quala ha immediat signalisau da vuler segidar.

Cunzun il baghetg dalla pleiv vulein nus restaurar il proxim onn ed aschia prevegnir d'ina decadenza. Sche pusseivel duei era il secund baghetg retscheiver in tetg da slondas. L'ucliva da Giuv duei reviver, silmeins ella historia.

5. Notg da film uost 2008

Per la sisavla gada ha il Forum cultural Tujetsch organisau ina notg da film ils 8 d'uost 2008. Allas 21.00 uras havein nus saviu dar l'entschatta ell'aula da scola a Sedrun. Danovamein havein nus buca giu cletg e stuii untgir dalla plievgia. Nus havein saviu presentar il suandont program dalla sera:

Revista 2007/08

Bruno Berther ha danovamein procurau per ina revista d'ina part dallas occurrenzas, fiastas e schabetgs specials duront igl onn ora. Ei setracta dils suandonts films: Porta Alpina – conferenza da pressa 13-9-2007, prelecziun da Vic Hendry ed Arnold Spescha ils 23-11-2007, fiasta da giubileum

Forum cultural Tujetsch ils 30-11-2007, la vischnaunca undrescha giuvens sportists ils 23-12-2007, til da tscheiver ils 31-1-2008 ed in di cun la tiarza dil scalem ault ils 22-1-2008. Isl films han dau perdetga dalla gronda activitad en nossa vischnaunca.

Va Mila – construcziun dil conduct ault

Il film producius 1949 durant l'erecziun dil conduct ault atras la Val Mila documentescha impressiunontamein las lavurs. Il film ei vegnius commentaus da Robert Bohnenblust-Soliva, il qual ha sez luvrau ils onns da construcziun e ch'ei sesents a Dieni.

Ivo e Laura – in film cun scolars da Tujetsch, realisau 1991

Il film ei vegnius realisau dalla Televisiun Rumantscha sut la reschia da Mic Feuerstein. Las figuras principalas "Ivo e Laura" ei vegnidas giugadas dad Andrea Hendry ed Adrian Cathomas. Probablamein eis ei stau pil mument la davosa notg da film. Igl ei grev d'anflar vegls films, ils quals plidenteschan ina gronda part dils visitaders. Aschigleiti che nus essan en posses d'ulteriurs films vegnin nus puspei ad organisar ina notg da film. Per il grond interess durant ils sis onns lein nus engraziar grondamein.

6. Calender

Per igl onn 2008 ei il sisavel calender cun fotografias veglias da nossa vallada cumpariu. Nus havein danovamein saviu vender la gronda part dils calendars.

Il niev calender 2009 presenta fotografias veglias ord la mesadad dil 20avel tschentaner en ner alv ord la collecziun dad Eugen Berther, Bellevue GE/Rueras. L'elecziun presenta fotografias dall'entira val. Aschia denter auter: Pass Alpsu cun anteriura ustria, Tschamut cun Hotel Rheinquelle, Rueras cun baselgia da 1731, Sedrun cun baselgia da s. Vigeli, sul Pass Alpsu viers Tschamut, tras Camischolas etc. Cun las entradas ord la vendita dil calender savein nus finanziar ina gronda part da nos projects. Per quei lessan nus animar tuts da cumprar in calender e sustener nossa cultura!

7. Casti da Putnengia

Danovamein havein nus stuiu desister dalla continuaziun dallas lavurs da restauraziun. Deplorablamein havein nus giu empau difficultads cun la planisaziun dalla restauraziun. La finanziaziun ei per gronda part garantida, aschia che nus lein cuntinuar en mintga cass igl onn proxim. Per Vies sustegn in grond engraziament.

8. Vic Hendry sigl internet

Il proxim temps savein nus presentar il Vic Hendry cun sia entira ovra, biografia, fotografias, honoraziuns, premis etc. sigl internet. Probabel vegn el ad esser igl emprem scribent romontsch ch'ei presenta en ina fuorma moderna alla publicitad. Nies consuprastont ed archivar communal Tarcisi Hendry ha buca munchentau da rimnar tut e presentar en fuorma digitala. Nus astgein esser spanegiai dils resuns.

9. Conclusiun

Nus savessen aunc descriver in tschuat activitads da pli pintga e pli gronda muntada. Denterauter sefatschentein nus d'ina senda romontscha, da differents objects culturals, l'ediziun dil secund tom dallas ovras da pader Baseli Berther, dalla viafier etc. Luvrar en favur dalla cultura munta lavur da pigns pass.

Era igl onn vargau havein nus contonschiu entginas finamiras. Il Forum cultural Tujetsch ei ina ferma petga per nossa cultura. Nus sperein da saver cuntinuar cun quella biala lavur ed animar adina dapli glied da s'interessar per la cultura.

Alla fin da nies rapport s'auda ei d'engraziar a tuts ch'ei sin ina moda ni l'otra segidai e s'engaschai per ils fatgs culturals en nossa vischnaunca. Cun grond entusiassem e plascher havein nus gia priu enta maun il niev onn.

Forum cultural Tujetsch

la suprastanza